

宋元舊本書經眼錄

增錄卷第一

獨山莫友芝子偲

呂氏家塾讀詩記

羣書拾補云呂氏讀詩記明御史傅應臺氏刻於南昌有嘉靖辛卯鄞陸鉞序從宋本出字多從古今其本頗不易得世所通行者乃神廟癸丑南都所刻本爾余曾借得嘉靖本以相參校始知神廟本脫去兩葉其他亦有遺脫卷一詩樂禮記天子五年一巡狩之前脫一段卷二十七烝民第六章鄭氏曰衮職者不敢斥王之言也王之職有闕能此下嘉靖本後印

者脫去兩葉神廟本竟無從補完嘉靖本係每葉二十八行行十九字今鈔補于後云云卷二十八第八

葉

謂神廟本下同

自彼成康奄有四方下脫誤十四字今補

之云云第十二葉後三行牟大麥也下多訛脫今補正之云云友芝家藏是書後半自卷二十一至三十二其行款及從古字悉同盧氏所舉嘉靖本盧氏所記缺脫此本一皆完好字墨精雅印用羅紋綿紙舊裝古色香撲眉宇恐尚是嘉靖祖本也道光癸巳買之京師雖非完帙已足寶貴矣道光戊戌復買一上半殘本版稍大行款亦不同癸巳本反切及注中增

注皆用單行側書戊戌本則悉易雙行癸巳本慨用
小篆古體作楷書雖不盡精貫亦畱意小學人所爲
戊戌本則十改六七如常書以校盧氏所舉詩樂一
條卽在脫中蓋卽神廟本也癸巳本每卷有潘雲龍
印未詳其人

易箋

安平陳定齋先生箋易論象數則駁來瞿塘錯綜其
象顛倒陰陽剛柔之實之非明辨以哲論筮法掛一
及再扐後掛爲前一變掛一後二變不掛而掛一之
策不入歸奇中三變皆以四八爲奇偶不用九五借

象雖異朱郭猶有發明於經義二條久見於四庫提要所稱道光戊戌禮闈始得其書琉璃廠肆觀其全而繹其旨蓋病術數言易之支離破碎故專就人事立說以愚夫愚婦之知能見天地鬼神之奧以省身寡過之學問揭盡性至命之微更事燭理觸物會象不侈統同之理使象爲虛器不求穿鑿之象使理無據依欲學者於身心體驗之中得涵泳從容之味不徒句釋字解以爲工強探力索而無當持平蹈質粹然儒者言矣頗歎數暢程傳朱義而與傳義異者甚多自謂如康成之箋毛詩故名曰箋于研易家其在

虛齋蒙引安溪觀彖閒乎唯其六十四卦經文於半
簡之中橫分四截首彖辭次彖傳次爻辭次爻傳而
大象別爲一條於後繫辭上下據史漢引改爲大傳
上下非鄭非王不今不古其于雜卦謂筮人纂便記
誦聖人存見反對之義目而傳寫多誤不必協韻以
韻正末數卦者未爲得首乾坤三十卦而咸恒則首
乾坤宜終坎離首咸恒宜終旣未濟爲一一更正按
其次顛倒脅亂非序非雜且通篇反對頤大過獨不
相連莫解其故又以困脫不字柔遇剛剛決柔君子
道長小人道憂皆誤添入悉增刪之改親寡旅爲旅

寡親信意武斷不可爲訓其酷信宋人圖書不服王
禕歸震川毛際可李穆堂之辨所申說嫌于浮游然
固不以揜其大醕也黔中前輩說易知者清平孫山
甫先生淮海易譚麻哈文鳳崑先生易注及是書而
三百易譚間有行本未之覲易注未受梓唯是書有
榕門刻本頗行于世維桑與梓必恭敬止是之恭敬
牽持益當何如耶

周禮註疏

此明正德時修補宋十行本其經補刊之策卽錯誤
無完篇其係原刻雖就漫漶無誤字通計宋刻猶存

十分之四亦可珍也善徵在祁門收閩本十三經其周禮乃以此本畱入因重裝抽出與仿宋儀禮禮記同匣弄而記其端同治甲子初秋皖寓邵亭晤交

禮記釋文

納蘭容若通志堂刊有仿宋淳熙四年本禮記釋文在經解之外卷末亦具撫州公使庫新刊注禮記二十卷并釋文四卷埵校正人軍州官等一紙則必並刊經注而板毀僅存者耳嘉慶丙寅陽城張氏省訓堂乃並仿刊以行於是海內經生皆欲家置紙貴一時邵亭嘗收其初印本以釋文校容若所刊絕無同

異既而于吳門見管洵美釋文卷端所記撫本異文則大勝兩本處不少頗怪陽城何以漫不省改適來邗上收一再校修本則洵美所記善處數十悉已補改其未改若干處則宋本誤字或筆蹟小異非兩字者乃知陽城刊此時其經注據顧氏宋本其釋文則直以通志本覆雕卷末竝云嘉慶丙寅某月其初印者中行計字數悉同通志下端葉數下則畱木未刻蓋誤改亦仍之其校修者則計字悉經補改畱木亦補刻匠者姓名末葉增嘉慶二十五年庚辰宋本釋文再校修訖印行一行又攷異末條亦經改定距刊

成時十五年矣故此書經注當以丙寅初印爲佳其
釋文則庚辰校修乃善也同治庚午夏邵亭晤安于
維揚書局識

春秋公羊傳註疏

此大理太和李中谿先生按閩時所刻十三經之本
每卷首葉第三行竝署云明御史李元陽提學僉事
江以達校刊世謂之閩本明南北監汲古閣所刊皆
從以出其初印本皆有刊校一行此本唯序首猶存
每卷則已削去或補一木條欲刻疏人而未刻乃修
板者爲之其板卽中谿刊非別翻也中谿本公羊第

二行漢何某學亦有木條未刻乃待刻疏人此乃削去

樂通

樂通三卷明人撰失其姓名其上卷有敬業堂匾舫稽古閣書籍記三印知查初白朱竹垞皆經藏而經義攷不載明史志千頃堂書目皆未收同治丁卯中秋得之杭肆其書在明代言律呂家頗爲明白惜爛去自序及目錄前半葉人遂失攷耳

說文解字

邵亭讀本說文在荳升第許丁巳客順元卽此本伴

行數歲以來相隨南北萬餘里庚申十一月至懷甯之廣邨雪中重装

用黟程伯勇學博

鴻詔

所錄其師汪南士文學

文臺

校本使寫官多錄於上下端時有一二溢于鐵橋校議外資補正者友芝昔刺取唐人及宋初人引許書異文若干卷思彙校一本此與校議竝益讐勘不少同治二年冬十月乙亥安慶軍次敷過識後

說文引經攷二卷

山夫先生著述傳者有別雅金石存皆精小學據金石以通其郵在乾隆諸老中亦卓然足名一家此攷

刻最遲故 四庫未著錄然宜與二書並重同治甲子六月皖城新收重莊記邵亭

四聲篇海五音集韻

五音類聚四聲篇海十五卷金真定韓孝彥允中以玉篇五百四十二部依三十六母次之更取類篇及龍龕手鏡等書增雜部三十有七共五百七十九部凡同母之字各辨其四聲爲先後每部之內又計其字畫之多少爲先後以便檢尋其書成于明昌承安間迨泰和戊辰孝彥之子道昭改併爲四百四十四部韓道昇爲之序殊體僻字靡不悉載道昭又因廣

韻改其編次爲五音集韻十五卷以三十六母各分
四等排比諸字之先後爲韻會所本其增入之字則
以集韻爲本改二百六韻爲百六十而并忝於珍併
檻於謙併儼于范併栢于豔併鑑于陷併釅于梵足
證廣韻原本上去聲末六韻之通爲二與平聲入聲
不殊又廢不與代通殷隱炊迄不與文吻問勿通尙
仍唐韻之舊非如集韻用賈昌朝請改併十三處猶
犁然可考其等韻亦深究要渺故 四庫收其韻而
其篇則入存目中二書唯成化十年官刊本成化丁
亥僧文儒有合刻本稱篇韻類聚其篇海題云改併五音類聚四聲篇

海其集韻題云較之他本多五音類聚徑指目錄餘
改併五音集韻較之他本多五音類聚徑指目錄餘
無所增損也向在京師收得一本以卷帙大棄之同
治甲子夏皖城市出文儒本略爲檢覈蓋全錄大廣
益會玉篇及宋重修廣韻而增之篇韻僅有張曹二
刻明內府刻者韻乃未備之本篇題雖亦云大廣益
會而刊落者甚多竹垞謂廣韻爲中涓所刪紀文達
不以爲然今觀明刻玉篇直是刪取字韻且非舊次
竹垞殆言篇而誤指韻也韓氏二書雖篇不稱韻而
併依爲篇韻校讐之一本則亦不可廢也
其篇中所載俗書頗有見魏齊石刻而他書不收者

復古篇

十有一月上旬訪王少山于東鄉百里見案頭有吳稷堂先生所藏復古篇舊鈔本亟借持以歸日來得暇乃舉而披之與去秋所寫安邑葛氏刻本相校而吳本奪譌特甚蓋拙手所書遠遜葛本而又幸其爲拙手書至有眞字疑字不敢妄改頗足以是正葛本蓋數十處葛本所有字吳本或奪去而葛本奪字吳本八九皆有如刮下坌篆及諸別字非字與軋攔之類是也亦有葛本寫到吳本不誤者如晦步百及諸字注或有先聲後形之誤皆當從吳本也如篆文尾

之從到毛侵之從又亦皆勝於葛本唯其敘字每篇接寫不以紐分故其注文從字之字多出於葛本者幾百餘此因寫書人以行足空白不容篆文妄以間字足之不宜據以沾改葛本又張氏之例俗字皆云別作某某爲此別他正者則曰別用某二本皆有作用互譌者皆傳寫之差可以意改也又篆從省隸不省之字注皆曰隸作某不省亦有數條不省下有俗字疑此類中俗字後人所加皆當刪去之今但就葛吳兩本篆注小異同及互奪誤處朱筆表識于旁或上下方俟他日多暇當更爲清逖成完本云道光十

有六年十一月廿有四日紫泉莫友芝識于蓮舫

增釋文互注禮部韻略

此曹棟亭所刻五種之一 四庫全書錄此種乃據

常熟錢孫保家影鈔宋刻謂前五卷與曹本同但首
無序文條例而末增貢舉條式一卷凡五十三葉所
載上起元祐五年下至紹興五年凡一切增刪韻字
廟諱祧諱書寫試卷格式以及考校章程無不具載
多史志之所未備視曹本特爲精善

續古篆韻六卷

吾子行此書 四庫未收儀徵相國撫浙曾以舊鈔

錄進至道光閒金陵陳氏乃有此刻子行箸周秦石
刻釋音一卷錄入四庫此書所載諸篆亦以石鼓
壇山詛楚及秦始皇泰山繹山二刻以韻編之又不及
郎邪會稽等而增入比干銅盤其于石鼓音釋與舊
異者或前人音釋岐惑者別爲第六卷曰疑字蓋二
書相輔而行也同治癸亥客皖所收手裝記之邵亭
明交

史記

史記題評一百三十卷嘉靖十六年丁酉太和李元
陽中谿按閩所刊亦具三家注惟索隱述贊不錄而集諸家

評語于書眉其不係名氏者則中谿說也其每卷題明李元陽輯訂高世魁校正亦有不題者亦有數卷李元陽上增題楊慎名者昇菴謫戍太和惟中谿爲至交此本蓋即昇菴輯本因增益以付雕故題云爾明人好尚評論是書刻有評者蓋昉于此後凌稚隆爲評林則又因此增益同治庚午暮春鄂肆收此以見一代風尚之由邵亭長記

四月還金陵見肆中有史漢異同四冊三十五卷亦嘉靖丁酉中谿校刊附此書後者其本出弋陽汪佃謂舊未有刻本在吉郡費鍾石少宰許手錄

者詳其後序中且及中谿題評之刻尋當購而合之

史記索隱

汲古閣仿宋刊單行本

同治壬戌六月皖口行營姚聲澂士贈此本約略檢勘足補現行官私諸本條以千計而毛氏刊誤亦自不少七月五日重裝散標所見於卷端時摘取中統本爲左證三日麤粗一過未得細讐期以他暇日也
獨山莫友芝記

南史

校本

此校以南朝四史對覈本書略摘異同奪漏於上下

端頗正其疏失紀首尾竝有石民印傳尾印之上有
題字一行云壬午五月先校南史十月初一日寫畢
源記石民有名字而不書姓壬午又不知其爲乾隆
道光其云先校南史知完此後卽更以此例校北史
滬上獲此已缺去卅三卷北史益無從問矣惜之同
治丙寅八月幾望自上海泛舟入泖口至松江草裝
爲五冊記其端邵亭

通鑑注商十八卷

涇縣趙紹祖撰

康熙閒長洲陳少章景雲著通鑑胡注舉正一卷凡
六十餘事老輩亟稱其精覈蓋本書繁重一過已難

矧注文零瑣乃能根勘謬誤爲尤難也琴士所商胡注未安乃至七百餘事十倍少章所舉而彊其攷訂之專精足爲胡氏諍臣以益學者其功尤巨云同治初元皖口行營新收手裝以增本書之後七月旣望邵亭記

讀史兵略

此胡文忠讀史兵略宋元明三代槁本其五代以前已刊行爲四十六卷宋以後尚未及分卷刪定而文忠沒矣前段板成時曾在鄂撫署多桂園爲之校誤因以此段槁相付已閱八年乃檢舊篋見之謹裝增

昔者校樣之後戊辰伏中邵亭

吳越春秋

元徐天祐注本大德三年十二月刊其十卷末題銜云前文林郎國子監書庫官徐天祐音註攷元百官志無國子監書庫之名萬姓統譜稱天祐登進士第德祐二年以國監書庫召不赴云云德祐爲宋瀛國公年號知天祐本宋末人入元不仕刻音註時追題宋官故云前前者謂前朝也是書又有明萬厯丙戌武林馮念祖臥龍山房翻刻本亦佳此猶元刻但非初印耳

通典

此明李仁甫巡按福建時刻本仁甫名元陽雲南太和人湏之淹通所首推者學者稱中谿先生著述最富升菴成湏之畏友也在閩所刻尚有十三經注疏在明南北監本之先今稱閩本校監本尤可貴不僅杜氏書也杜氏書每門或子類之末輒增入宋人議論數條不知誰何所爲攷四庫提要政書存目載南宋麻沙刻通典詳節列引用諸儒姓氏止于呂祖謙陳傅良葉適三人于八門內汰其兵制又刪去喪服之制此本所列引用姓氏正與之同喪禮中亦都

無議論則卷中增入蓋自宋已然矣唯詳節無兵制而此本兵第一卷尚有宋人議論數條是議論蓋南宋人刻通典者增入爲詳節者據而摭錄仁甫但以宋本翻雕未及汰去決非又據詳節所增亂本書也且所增皆卷尾低一格書尚無大礙壬戌中秋邵亭記

欽定天祿琳琅書目

天祿琳琅書日本十卷此闕末一卷同治乙丑春友芝奉湘鄉公委訪鎮江 文宗揚州 文滙兩閣四庫全書經燹後如有散存千一宜購歸恭貯以待

重繕夏日歷瀕江諸郡有以宋元舊槧若干帙來覈
定者適維揚市出此本亟購以待鈔補且所闕僅明
板集部關攷證者正無幾也向讀韓昌黎集五百家
注許氏刊者苦無外集 文淵閣四庫總目著錄亦
然檢此帙載五百家注韓文凡二部並有外集十卷
別集一卷韓文類譜七卷又增論語筆解十卷今類
譜筆解皆別有刊本行世而外集別集之魏氏注者
竟杳焉無傳當纂集 四庫全書時何以 中祕舊

藏獨忘檢校所未解也

所闕第十卷丙寅六月鈔補訖

授經圖二十卷

萬曆二年朱氏原刊本

此朱中尉西亭氏原本康熙閒龔蘅因因以重刊黃
俞邵校之頗有增訂俞邵序謂其載傳注時有闕誤
而類例亦未盡善如古本易上下經十翼各自爲書
王弼本始以彖象文言繫各爻辭下書則伏生口授
二十九篇先興于齊魯古文後出孔壁先儒多疑之
舊本先後不無參錯予與蘅圍重爲釐正易則復古
爲先書則今文爲首其他經傳缺軼者復以諸史藝
文志及通志通攷所載咸爲補入而近代傳注可存
者亦閒錄焉視西亭所輯庶幾稍備矣乎此明刊未
經校補者 四庫謂無刊本以龔刊箸則未見此本

也

金石萃編補目三卷附元碑存目一卷

黃本驥撰

咸豐庚申夏大興劉子重

金福

以長沙黃虎癡此清

本相示云以未刻本子重在湖南時手付者亟命錄副以存吾友遺書一種五月三日畢工因校首卷記之是日長至又賤子五十生日他日此稿或因以傳也

秦漢瓦當圖記四卷附補遺

朱楓撰

朱排山此記特就其在關中蒐訪所獲錄之殊不備且皆習見唯末一事溝瓦之當有長樂未央字者是

昔人所未及戊辰中伏邵亭識

養生類纂

案卷周守中撰

此無總目終二十二卷服餌一則服餌似尚有一二
卷攷千頃堂書目宋周守忠類纂諸家養生至寶二
十二卷又養生月覽二十五卷此當卽至寶也

普濟方

此普濟方殘本十二冊始此第六十九卷至百十六
卷止中缺不連者猶若干卷其卷大者百餘葉卷小
者亦三四十葉方書蓋未有富于此者考宋元醫家
無此書惟千頃堂書目載明周定王普濟方一百六

十八卷蓋卽此書明史藝文志載此書僅六十八卷則寫脫一百二字也未見刊本此殘鈔爲汪閬園舊藏亦有若干類可觀覽者同治庚午中秋金陵市出所收草裝畢記其首

太玄經范注

此明江都郝梁據宋萬玉堂本傳刊者愛日精廬藏書志載有此本蓋明時佳刻也然其一卷羨首卽脫去贊之初一經注三十六字凡傳刻古書不依舊式每有此病宋本半葉八行行十七字圖後增說六葉前又有司馬溫公集注序及說玄集事蓋皆刊本所無昔藏者錄

以備觀溫公自有書不應羈入此本耳

此陽城張氏省訓堂舊藏同治乙丑四月收于蘇肆尚闕第二第三兩卷丁卯八月于杭肆獲此刻殘冊適足相補戊辰二月攜來江蘇書局欲以萬玉堂本校因手裝過記之二十一日己亥邵亭晤交

戊辰二月壬寅以所假宜稼堂所收萬玉堂本校此三冊三月庚寅畢功萬玉本足補正此本蓋千有餘字子高傳刻亦何草草乃爾耶亦有此本是而萬玉本誤者三四十字蓋所據傳刻別一宋本前輩以爲其據萬玉本者不足馮也此書明末尚有黃石齋本

卽用萬玉本覆刊而削去板心萬玉堂字其勝此本多矣

封氏間見記

封氏間見記寫本十卷同治丁卯中秋杭游所收整理散亂僅失末卷尾半葉後一紙記二行云隆慶戊辰借梁溪吳氏宋鈔本錄知是明人舊鈔手裝以存是書元明以來無刻本至乾隆中德州盧氏乃據虞山陸勅先所錄孫伏生家本刊入雅雨堂叢書孫本爲吳岫方山舊藏錄於正德戊辰不言所出孫氏又假泰西巖別本校勘秦本則朱良育依唐子畏柳大

中兩本先後各鈔五卷者有至正辛丑夏庭芝跋蓋
出于元鈔此本據宋鈔則又兩本外之別本已已開
歲書局獨居無事乃以盧刻通校一過其足補刻本
佚脫者第二卷石經條首百六十三字三卷制科條
二十三字銓曹條六字四卷尊號條二十六字露布
條八字五卷燒尾條十九字圖畫條二十四字外此
足補正一二字脫譌又各數十計始知此本遠勝方
山西巖所弄隆慶戊辰距今逾三百年所據宋鈔斷
已無存海內決無更勝此本之帙在邵亭子部中直
與宋本同什襲可也晁氏讀書志載此書五卷與唐

書宋史同此及方山西巖依宋元鈔者乃皆十卷殆
自宋卽有此析五爲十之本晁本無傳未從質矣其
第五卷長嘯條刊本多二十五字云蓋出其言善千
里應之出其嘯善
萬靈受職斯古
之學道者哉校注謂原本朱筆增入吳方山云二
本俱無今此本已增刊本數百字而亦無之蓋校者
依他引嘯旨語記于行閒者不必定封氏書所有也
穀日燭下莫友芝識右跋隆慶戊辰錄宋鈔本

以明隆慶戊辰錄宋鈔本校此刊本第二卷石經篇
增出百六十三字三卷制科增二十三字銓曹增六
字四卷尊號增二十六字露布增八字五卷燒尾增

十九字圖畫增二十四字其一二字足補正者又各數十處悉于卷端行間標記以便觀覽此刻所據陸敕先依吳方山秦西巖兩本錄校者不及隆慶舊抄遠矣封氏書雖說部雜記其述唐代掌故多史志遺略足充學者考鏡資糧漁洋亟稱之雅雨亟刊之皆以此儻有好事更以此校付雕當亦王盧所深許也同治己巳開歲人日校完穀日識獨山莫友芝

右跋雅雨

堂刊本

回溪史韻

此史韻五冊其三冊蓋影宋鈔僅十七卷當卽竹垞

跋所謂從琴川毛氏長洲何氏所藏合之寫存才十七卷者又益別鈔二冊六卷合爲二十三卷與擘經室進書提要合然則此書之存于世僅此弱半而已竹垞所言見于京師嫌殘未錄之七冊殆不能多也同治丙寅九秋胥門收此裝成記

新編事文類聚翰墨全書

此書蓋以十干分十集而各集門目皆互相補無重複亦如祝氏類聚雖一時免園冊子而宋末及元初人文字不傳者亦得略存一二不必盡供應俗也諸家書目唯黃虞稷明史藝文志稿有之當亦見于頃

堂書目云劉應李事文類聚翰墨全書九十八卷注
云字希泌建陽人咸淳中進士授本邑簿與熊禾胡
庭芳講學洪源書堂覈其編錄之意蓋亦宋人翰苑
新書之類 四庫提要不載則進呈未及目同治丙
寅九秋蘇門市中收此殘帙僅乙巳庚三集及戊集
之末冊于全書僅三之一以其猶是元時刻印姑存
之書其端示兒輩邵亭晤交吳江舟次

穆天子傳注疏

檀默齋氏穆天子傳注疏極力開荒爲宋于廷氏所
推服惜未肯翦去蕪衍以成簡當耳然滇荒窮宦藉

抒無聊之思至精闢不磨處故是奇作庚午仲春友
芝搜獲於安慶肆中漫識

道德經唐玄宗注

此寫本同治丁卯秋吳門所收蓋出于道藏者庚午
中夏來維揚書局以易州石幢唐刻校之記其異同
寫本固多誤亦時有可證石本處十八日雨中燭下
邵亭

孤忠小史

元九龍山人編此書不知幾卷皆道家言如列仙傳
之流而書題孤忠莫解所謂己巳初冬揚城書攤漫

收以供舟中觀覽寫本甚舊亦元明間物也

楚辭集注

蔣楚稗刻朱子此書並辨證後語增焉可謂足本但不應于後語六卷後增入明人騷體爲七八卷又朱子所刪之諫懷歎思四篇復鈔置辨證之前亦不合若以所補後語及四篇增覽並退出別編使不與本書相亂卽無妨矣咸豐庚申十一月懷甯廣邨寓館邵亭記

陶淵明集

陽子烈所編十卷本咸豐辛酉嘉平皖城行營收旌

德縮刻宋本初印者此板後多漫漶不可讀繩宜寶之邵亭珥笈呵凍記 毛扆祕本書目宋板淵明集注云桃花源記中間之欣然規往今時本誤作親謬甚五柳先生贊注云一本有之妻二字按列女傳是其妻之言也他如此類甚多卽四八目比時本多八十餘字而通本一作云云比時本多十餘字 按所舉二條竝與此本合通本校語亦多于時本然則此所據卽毛氏宋本也

汲古閣刻陽休之編本此冊非舊印以增錄卷中載有吳仁傑所編年譜爲家藏書所無故裝存之王戊

六月六日邵亭皖口行營記

右跋又一本

元次山集

淮南黃又研旅刊本

同治壬戌九月庚戌朔獨山莫友芝手校畢于十二巷外蒐得冰泉銘及再讓容州表與載本傳之自釋凡三首使繩兒別紙寫附卷尾更畱餘紙亦待續得云

翰苑集

世行陸宣公奏議本皆十二卷無注此獨十五卷有注雖文無增損而卷帙次序小有異同其注略具史事亦不繁冗當是宋元舊帙明嘉靖時翻刻而遺其

注人以書式皆宋樣而東坡等所進劄子猶用當時
提行格式故知非明人注也同治元年三月繩兒收
獲重裝書以俟攷邵亭明安

是歲七月既望見昭文張氏愛日精廬藏書志載有
注陸宣公奏議十五卷云至正刊本宋郎晈注前有

紹興二年晈進書表

興當作熙

題銜稱廸功郎紹興府嵎

縣主簿臣晈不著姓案清波雜志曰輝友人郎晈晦

之杭人嘗注三蘇文及陸宣公奏議投進元吳文正

公集陸宣公奏議增注序曰因郎氏舊注而加詳劉

岳申申齋集曰宋紹興中有郎晈嘗注陸公奏議以

此知爲郎暕也表後云紹興二年八月初七日進呈
案表中有云恭惟至尊壽皇聖帝攷淳熙十六年光
宗受內禪尊孝宗爲至尊壽皇聖帝次年改元紹熙
則興爲熙字之誤無疑卷一後有至元甲午仲夏翠
巖精舍重刊木記脈望館書目著錄 據此則此本
當卽據元刻郎本翻雕而失載其進書一表愈不可
了目當錄入卷中以俟攷

孟東野集

同治丁卯秋收于武林此嘉靖丙辰無錫秦禾知武
康縣時刊本依宋景定中天台國材知武康所刻宋

敏求編定者其聯句十首載昌黎集中者敏求以其章著不錄此仍錄增第十卷後秦氏爲之也戊辰花朝蘇城經訓堂手裝記

傳家集

司馬文正傳家集在蘇收得明人依宋本舊鈔闕卷四十八至六十凡十三卷肆中有康熙閒夏縣刻殘本按所闕文篇目拾以補觀夏刻與宋編卷次不合乃付雕者妄爲改編其刻又惡此鈔雖多譌錯不工然猶勝此刻乾隆辛酉陳文恭公爲蘇臬時亦刊此書世稱善本當以此舊鈔校之

辛稼軒集

九卷疏議劄子論文啟三卷詩一卷詞五卷
增辛啟泰所編年譜一卷

辛忠敏集久亡此嘉慶中萬載辛敬甫綴拾殘牘爲
之計不過十一目唯詞集別行乃獨全忠敏僅詞人
哉古來人物文章傳否皆作如是觀

偶思讀稼軒詞適得此本鼠蛀幾無完葉竭半日之
力揮汗整補重裝亦幾玩物喪志矣此本爲其族裔
敬甫刊校汲古本增多三十六闕故是足本壬戌天
貺節皖口記邵亭

元遺山詩集

此影鈔明宏治戊午汝州重刻曹益甫所編二十卷

本較全集中十四卷之詩增多八十餘首明末毛子晉刻元人十家詩其遺山一家即用曹編大書疏行改寫上木此之細行密字蓋猶元式也同治戊辰暮春收于闔門肆中重裝記

明沁水李瀚叔淵宏治戊午巡按河南四月序刻元遺山詩曹益甫編二十卷本于汝州閏十一月又序刻遺山文集四十卷于開封此耕釣草堂影鈔舊本首有段穆亭氏至元庚午爲益之二子刻書引亦載叔淵刻此書序而云附則其據許州本或至元本未可知也近施北研注元詩厯舉康熙時華刻全集之

誤悉以開封本正之並條查初白讀本之是非以此
本校之皆一一不誤則所據本之善可知其于原本
湧縮數處皆摹其狀故知爲影鈔也其影者至元本
可寶不必言卽許州本當亦不下至元北研不見許
州本知傳者已稀然以中州本例之其校刊亦非苟
然矣此影手雖未致佳然殊不草草細行密字矧大
資我舟車耶戊辰四月己丑邵亭識

潛谿集

元至正刊本

此二冊皆景濂元時所作多宋學士全集所不載
四庫著其全集復載其未刻集二卷爲金壇蔣超簡

存者此本中皆有之可以互補也邇年福建有先生
諸集彙編全刻此八卷計及五分之一目以舊刻收
以備攷壬戌秋杪邵亭記

願學集

明鄒元標撰

此忠介集之初定本也今文淵閣所錄卽此八卷
吾家舊藏此集外別有存真集若干卷太平山房疏
草若干卷四庫皆不著錄則當采書時僅進此本
故耳南皋以謫開勻學其著述尤服膺同治初元皖
中收此亟裝付子弟珍藏俟更求存真疏草也

學孔精舍詩鈔

明孫應鼇撰

此二冊六卷咸豐甲寅閏七月寄到自麻哈艾述之
從其祖鳳崑侍講手鈔本過錄者疑卽明史藝文志
所載學孔精舍彙稿十六卷之末數卷也鳳崑錄之
必見彙稿之全文恭文在詩右不知何以不錄今遍
訪不得殊可惜也就卷中詩通覈之所厯官皆備先
生之詩此當足本惟省志載有聖壽寺小集一絕思
南志載有孝友堂小七古三首爲此本所無聖壽寺
詩據清平志乃孫興甫作而省志誤爲文恭孝友堂
詩當嫌事涉語怪不存其稿皆非遺脫也二十有一
日獨山後學莫友芝識

潘氏八世詩集

貴州家世有集者曰越氏楊氏吳氏潘氏越至卓凡
屢非楊至龍友洵美堂吳至滋大敞帚並濟前美稱
一時一家之盛而繼者吳氏猶傳復旦漱石餘則未
之有聞惟潘氏自朗陵味淡軒士雅瘦竹亭已足埒
越吳楊諸家而觀黔西潘生元炳所輯家集始明萬
厯迄國朝道光閒由朗陵而下凡八世十有三家
爲詩若干卷二百餘年風雅相續不衰嗚呼尤可謂
極盛者矣朗陵之祖伯瞻惠政在滇州伯瞻子中池
活武定冤獄朗陵乃以文章科第起其家安賊圍貴

陽朗陵毀家誓死保城以完慈惠忠貞澤流無既宜
哉而元炳敬奉手冊至八世二百餘年罔有失墜噫
亦可以風鄉里之爲子孫者矣咸豐二年秋七月

朗陵名潤民祖維嶽字伯瞻號抑菴貴陽人嘉靖
丁酉舉人知雲南永平縣遷昆陽州所至有惠政
卒之日家無餘資思聰字子忍一字中池司武定
府獄府欲冤殺武定民樂應舉力生之樂氏祠祀
累世朗陵萬曆癸卯解元丁未進士改庶吉士官
至雲南左布政使字用霖號朗陵著有味淡軒詩
集子馴驤馴字士雅號韻人一號純菴崇禎己卯
舉人國朝順治末知雲南蒙自縣著有瘦竹亭
集出岫草驤字子襄崇禎中選貢考授桂王時雲
南羅次知縣升四川崇慶知州著淡亭集馴子
德徵號亦韻字道子康熙己酉舉人官至武定知
府著玉樹亭集德徵子奕快奕字允大康熙中監
生著演遊草快字无悶康熙壬午舉人著畱餘堂
集奕子文芮文苞文芮字右質一字彬也貴陽優

廩生雍正中教授黔西州翠屏山因家焉自號翠屏寄客著翠屏寄客詩文集文苞字鞏也乾隆庚午舉人官福建鹽大使江西北城知縣著珠雲軒詩草以上五世竝貴陽人文芳子曉字東白黔西州學生著斷續亭集曉子以潑以潑字靜川黔西州學生著甯愚堂集以潑子桐樺桐字鍾嶧大定府學生著思敬堂集以潑子桐樺桐字鍾嶧監生著客畱草榻字雲表黔西州學生著蕓蘭軒集祥芝

增注

魏忠節公集

右嘉善魏忠節公廓園先生自譜及家訓遺囑日記疏草書草詩草雜著四序並天啟五年被逮途次手稿行及良鄉使僕飛鴻付其子學伊者當逆奄擅權除不埒己之君子先生又同姓乃爾故疾之殆甚楊

左諸君自辭家上道卽知不得生還奔波忽遽中堅
定整暇訓述周詳

下闕

山水移集

右楊龍友先生山水移集四卷附錄一卷崇禎己巳
七月先生奉其父霞標參政爲天台雁宕之遊哀其
詩文圖書以歸謂之山水移旣而刻遊集附以前後
一二年作遂仍其名集中有立春七律蓋卽遊台宕
年詩其起句云三十三年電光走然則此集僅先生
三十後數年作也其詩骨挺勁岸異已有不可一世
之概未到者渾融百崇禎末先生又刻洵美堂集見

明詩綜引邢昉曰洵美詩紆徐以導遠篤摯以達情
史元曰洵美詩沉澹淵遠有正始之音杜濬有懷龍
友諸君詩云黔蜀波瀾老所論皆與此集不契知後
此所造必更有深焉者屢訪未得其本先生值遺明
殘局猶螳臂措撐妄思恢復膏斧鉞而不回其志節
挺挺至今有生氣詩文流傳正因人重洵美集既不
可見而此山水移舊冊又歷千百劫僅存於塵堆鼠
窟中而乃今出之若有陰爲呵護然者亦愈足珍惜
矣集以詩百三十九首爲一卷亦城山賦並張琬賦
序爲一卷台宕日記及江行十二畫記爲一卷腐候

傳爲一卷增錄諸社長送游贈言一卷則夏允彝送
行詩序及陳則梁宋存楠張堯翼張明弼繆時英陳
元綸宋珏七人送行詩而雜以陳煒支如增兩序朱
隗朗道人顥蔡如蘅臧煦如四人詩沈鉉賀懋修二
人跋皆爲集題者又有陳煒答詩五首錢旃魏學濂
題畫詩潘一桂畫贊周祚新張澤季肇亨錢棻秦懋
德何白六人畫跋凡二十五人之作首載其舅越其
杰其師鄒嘉生兩序并其杰四詩而又以董其昌陳
繼儒倪元璐李日華譚貞默五人題畫冊引范允臨
題畫詩李思聰送游詩謝上選題集詩並雜置卷端

以張結納之盛杜濬有云昔年龍友請余爲其季子作傳肅衣冠以五十金潤筆而茅止生來索觀余文猶嗤曰龍友小樣不知文章痛癢止生之譏殆緣此類然今去先生二百餘年不惟籍見一時交遊而謝文若周又新蔡湘渚皆黔竹文人著作盡逸越自興雖有詩而文亦未見竝得畱吉光片羽所補爲不少矣咸豐王子黎柏容學博從定番張氏假得相示亟錄副待好事傳之因書其後

漁洋山人精華錄

林佶吉人手寫當時名集付梓者三午亭集堯峯文

鈔及此錄也三家詩文豈必以估書重而估書精印
本尤世所珍弄小伎顧可忽哉壬戌夏四月善徵弟
收于祁門攜至安慶增衣草裝書示繩兒

蓮洋詩選

蓮洋詩佳處正似南田寫生于古來能事外自透出
一種天趣愈覺鮮秀撲人其出之自然尚有漁洋所
不及處無怪其亟詫得髓也使學更能稱才太白東
坡一閒耳又安來藏園卷施之不滿哉庭弟學詩稍
腐氣計唯中條華妙對證而易服爲檢出若干首五
言據三之二猶不能盡其勝七言二之一幾不能及

始欲更去昌化寺觀吳偉畫壁陟領赴潭柘寺等數
篇則愈寥寥故亦過存焉蓋先生五言有深功七言
徒信才目前輩云天姿國色粗服亂頭亦好又謂動
用佛典是其一短皆是定評不可不知也道光乙巳
正月六日

河岳英靈集

篇中宋諱或避或不避惟虧字寧宗嫌名數見皆闕
筆蓋寧宗時刻也丙寅冬初邵亭校讀一過

宋文鑑

此選固不如唐文粹之善而北宋諸名家當行文字

亦庶幾備矣頗有本集不存猶籍攷見一二者有本
集存而集外可補一二者甚有資於文苑此明晉藩
翻宋刻本亦尚不惡惜缺去四十餘卷幸所存猶過
三之二已多平昔未見之篇故聊收之壬戌初春皖
口行營邵亭

皇元風雅

前集六卷傳習采集孫存吾編類虞集校選
後集六卷孫存吾編虞集校選

皇元風雅前後集是據元刊本舊鈔蓋汪閬源氏千
元之一也 四庫全書提要載此集前後各十二卷
前集百十四家後集百六十六家此本家數大略相
等而卷數各減半殆與 文淵閣著錄本無大不同

特卷帙有合并耳同治丙寅中秋收于雲閒肆中初冬還金陵芙衣爲裝過記其端邵亭晤交

初白葑詩評

增許蒿廬詞綜偶評一卷

近日子弟爲詩文苦不得門徑者或取老輩點勘過大家集子及子史令其遙鈔每有悟入處此等事不關根抵通人所嗤然以啟發中材爲益不細皖口行營偶收此評本老來無暇觀覽付兒輩存之亦備遙鈔一助也邵亭晤交

唐五代詞

此集以花間集爲底本而增益之其在花閒外者太

白及南唐中主後主皆引令之極軌其卷十又備錄
馮正中陽春集溯詞之源觀此已足邵亭

增錄卷第一終

孫小農校字

增錄卷第二

獨山莫友芝子偲

秦之罘刻石摹本

繹山會稽兩秦刻再三傳本何首尾完具乃尔蓋卽徐鉉申屠駒意爲補綴故與現存卽耶泰山字皆不類此嚴鉞橋先生意摹之罘廿一字乃去眞秦刻不遠何徐申屠之足言哉同治丙寅六月自金陵來滬上訪遺書戴禮庭以陳嗜梅翁藏卷相視因記

秦泰山刻石摹本

以好古拓鉤摹下眞蹟一等者與鉤摹剝蝕古帖下

眞蹟二等者皆上上妙手泰山秦刻廿九字乾隆初
碧霞廟火拾出碎存于玉池中者僅斯臣去疾一行
四字及昧死臣請矣臣三行六字兩小石其拓本流
傳猶如快劍斲生蛟鼉決非後來所能仿佛此鍊橋
先手蹟乃能僅下眞蹟二等以視阮孫諸刻直孱芥
無生氣始知此老精諸突過一時能事也嗜梅翁鑒
眞好古又挾之出劫火中以存可謂得所矣同治丙
寅六月中伏避暑上海也是園獲觀識

漢庶孝禹碑

此拓同治九年冬潘伯寅少農所寄謂肥城新出者

左方刻隸書一行云同治庚午某某訪得此碑于平
邑肥城平陰壤接蓋獲諸平陰境移肥城爾碑僅二
行一行八字云河平三年八月丁亥二行七字云平
倉庀里庶孝禹漢書成帝紀是年八月乙卯晦則丁
亥爲二日平倉卽平陰假古文霽之舍而筆迹小異
庀里卽廣里光里之別體諸字書所未收平陰廣里
本齊邑里名平陰至隋始爲縣漢爲濟北王國之盧
縣地與肥城同隸泰山郡續漢郡國志云濟北國盧
有平陰城有防門有光里有長城至東海卽左氏襄
十八年傳所謂晉同伐齊齊侯禦之平陰塹防門而

守之廣里者齊人言廣音與光同故或稱光庀之讀

蓋如光矣

方輿紀要引平陰故城志云在縣西北三十里齊平陰邑也京相璠曰平陰在盧

縣故城南十里蓋卽今縣地又曰平陰城南有防

有門于門外作塹橫行廣一里又曰防卽長城平陰

南有故長城東至海西至濟河防門去平陰

三里防門之北有光里今其地亦名廣里云

左氏所

言廣里本謂齊之塹防廣一里後來遂以廣爲里名

又或稱光與此之別爲庀寔一地也庶姓姓書所逸

唯時見于漢刻韓勅碑有故涿郡太守魯庶次公故

樂安相魯庶季公曲阜魯王墓前石人胸字有樂安

太守庶君亭長上之則史記載將卒攻卷之庶公與

蒙鰲王齧同爲將軍見秦始皇本紀是庶姓漢前已

有之特漢以後未聞耳而應劭漫謂庶秦邑索隱遂謂庶邑公史失其姓名正義又謂秦之縣邑大夫稱公若楚制皆無的據承應氏而失之也此之孝禹不書爵位自是處士又但記歲月鄉里不言碑所施疑亦墓石墳壇神座之類乃並漢故表碣等文無之古人簡質蓋可慨見今存漢石自西京者希矣曲阜之魯孝王刻石及揚州淮南厲王墓之中殿第廿等小石並此三百結字蕭散天真筆意渾勁兼分篆亦與中殿相似邵亭眎交識于淮南南書局

漢夏承碑

漢碑至夏承上引篆籀下通隸楷書家精能至斯極
矣魏曹真一石乃遙與助其波瀾雖雄厚少遜而後
來引篆籀美隸楷名家殆未有不自然出者積雨初
霽木筆盛開展對鄭堂此卷百過不厭同治己巳仲
春望日

漢三公山碑

此碑是隸非篆不得與崇高太室開母廟闕同科誠
如覃谿之說其釋文小松爲善故命繩兒依錄惟八
行闕祐是祐非裕甚明故不從百辛未初夏

漢光祿勳劉曜殘碑

在山東東平州同治庚午六月新出于州之蘆泉山陽閨月景鑑泉閣學經邗上贈邵亭 其所歷郎中謁者太官令朱爵司馬居延都尉議郎河內太守長水校尉宗正尉衛光祿勲故隸釋題光祿勲劉曜殘碑 無鹽乃其里縣見額新跋云無鹽太守失之矣漢人銘墓以郡邑題其首者惟見此一碑

漢曹全碑

此舍弟善徵祁門所收乾字左端直未穿尚是舊拓惜紙墨不精且無碑陰此碑陰字尤自然可愛也同治丙寅春重貼過畱餘紙以待 伏日寓上海城中

也是園酷暑無可逃段書肆景完碑陰錄一過瓊字
字書所無玉篇土部有瓊同敷精姓僅見

漢伏生授經圖

此石道光二十五年四月日照許印林瀚獲于沂州
府治西北古北大寺西廢園中移置琅邪書院同治
四年十一月訪丁儉卿丈于淮安畱晚飯印林之子
逢吉適持此石拓三紙贈丁丈遂乞一以歸邵亭是
日辛未頤志齋中

新莽始建國鏡

德清戴子高文學示始建國鏡拓本徑莽尺七寸二

分彊篆銘五十一字云唯始建國二年新家尊詔書

啟下大多恩賈人事禾蓋利字貳蓋丁字丁貳酉

蓋田字田更作口疑符字應治百官五穀孰天下安有知

之山蓋士字得蒙恩宜官散葆子孫中層七乳間七文

復兩有子孫字餘三文若鉤藤糾結殆非字也子高

謂此鏡祥符周星詒季貺所藏季貺咸豐庚申歲就

官福建同知收于福州采銅局失手墜碎爲二命工

銀鑲合之子高同治癸亥之福州手拓此本篆書帶

隸殊不如爾時官家泉布之工然亦與元初三公山

碑延光太室石闕後銘筆勢相類雖鑄人刻劃古意

固未泯也漢鏡有紀年者翁覃谿金石記載元壽元年永康元年二事並此而三百丁卯開歲九日

吳禹陵窆石題字

此據王少雀先生藏劉燕庭熙海舊拓寫其前似有字四行爲宋紹興時從事郎題詩所磨後有字一行又爲會稽令題名所磨其上隱約有二字其下當有幾字不可知張氏每行十六字之說不足據也其有大字處高廣如杜記王石上二字疑是梅梁又疑無梁

晉周孝侯碑

百三家集元校云此碑據舊集鈔之中多訛謬文理不接且孝侯旣戰沒而云舊疾增加奄捐館舍尤可笑也攷常州志此碑尚藏于廟而所載亦是如此當是古碑殘滅後人取斷簡以意補湊之用勒于石遂沿以爲眞百尚須博攷

宋爨龍顏碑

大明二年

劉宋碑版金石家皆未之及今唯傳仕德此石百後晉爨寶子一石五十四年在雲南陸涼州

梁建陵闕

此梁武帝父順之陵闕也其正刻一石見歐陽集古

錄而誤屬宋文帝王象之已爲舉正宋以後遂逸此反刻一石同治八年春友芝始并訪獲猶逸正刻太祖皇三字婁陽葆光乃蒐出合之九年秋九月辛卯題記

梁安成康王蕭秀東碑

宋張敞頤六朝事迹謂秀墓碑二其一已磨滅卽此碑也今審其額猶可識拓備一種額下有窅窅下乃刻文猶存漢晉來碑制其西碑及始興碑亦然

梁安成康王蕭秀西碑

距東碑七八丈許東西相鄉六朝事迹謂其一字畫

猶可讀乃彭城劉孝綽文又云是貝義淵書在清風鄉甘家巷卽是碑也今巷仍舊名在江南會城太平門東北二十七里碑文已剝漫無一字唯額略可識其陰刻人名約千有三百餘人存剝相半猶可尋南朝小楷法度勝抱宋以來集帖虛慕晉人也中最奇者薤蓋姓苑字書所未見史稱秀薨佐吏夏侯亶等表請立墓碑詔許之當世高才游王門者王僧儒陸倕劉孝綽裴子野各製其文欲擇而用之咸稱實錄遂四碑並建今二碑南側立二石柱一以一剝二柱之南二龜趺亦東西向又南二石獸四碑之迹猶

可仿佛而二宋前已毀二碑僅存空石四文竟無一
存可慨也秀武帝異母弟建碑必待請報可者隋書
禮儀志天監六年明葬志凡墓不得造石人獸碑唯
聽作石柱記名位而已秀以天監十七年薨在明葬
志後故曰

梁始興忠武王蕭憺碑

在安成碑西一里六朝事迹所謂徐勉造貝義淵書
在清風鄉黃城邨者也最古卽梁書邵陵王傳載將
軍趙伯超議征侯景所不宜從之黃城大道今黃城
之名唯六七十笈猶記之問少壯者皆茫然碑文漫

剝三之一撰書人在碑末尚未損其清朗處校北魏諸刻格韵相等而差朗潤蓋南北大同小異處上承鍾王下開歐薛皆在此碑其漫剝處細審亦能得十二三以較王蘭泉氏金石萃編所錄可多識千許字如第一行公諱憺字僧達南徐州蘭陵郡蘭陵縣都鄉中都里人凡廿一字次行提行云太祖文皇帝之少子今上之季弟也卽萃編所未錄碑陰未經磨厲審無刻字碑西向南側又直東石獸蓋其東碑其西適有龜趺東向南側直西石獸其有西碑無疑凡應刻碑陰者當具其中亾在宋以前矣蘭泉粹編乃指

安成西碑陰爲此碑陰疏誤之甚

增釋文

識而未確者加方圍

公諱憺字僧達南徐州蘭陵郡蘭陵縣都鄉中都里人太祖文皇帝之少子今上之季弟也洎維命

氏含光華滋累代尚聖於□□不基於王業苞河海而爲浚指雒閭而同陰天乙降玄鳥以居亳微子駕白馬而君宋爰初啓姓是惟建國文終德冠羣后少傅儒雅一時積葉寔爲會昌自昔太祖嘉猷貽謀奇計命世德惟時並名與功偕齊祚之初佐成大議道書天府勛紀太常仁義爲基厥後斯大爰集寶命

興我 皇家盛德之風於斯乎在公稟五緯之純嘏
資三才之聲靈踐高明之盛儀體濶壹之弘道侏尙
英邁風儀澄遠聲爲律呂言成典誥嬉亂之歲早有
令德并角之辰夙懷聰敏率由孝友因心敬讓時年
數歲所生吳太如有疾公衣不解帶累日絕食迨乎
執喪毀瘠過禮慕兼樂正哀甚顏舍弟與羣伴閑居
忽爾雷震羣者駭散惟公獨否旣聞民爹之歌弥見
台輔之量故典戈負弩□□功倍諮經問道匪扶自
直室还人遐則應之千里始登冠禮成膺府命叅西
中郎脩伍法曹倣遷外兵優遊戎佐談詠而已齊德

將昏人離衆散 聖皇乘時撫運念拯生民龍驤漢
水帟據南徐公與第八兄南平王偉知□□所歸絆
職待從觀風雲之會乘天地之符衆猶熊熊將如貔
虎五臣十亂之旅四七二八之雄縱橫上略紛紜決
勇公參贊神謨夙興帷幄功均七壘南康王攝西朝
制命荆陝以公爲冠軍將軍西中郎諮議相國後事
中郎俄遷給事黃門侍郎霸王振興連旄西土義師
雷動龔行天討公與南平王留守雍部于時四海宅
心八百冒會人神協契莫不率從而廉惡之羽弗識
天命先迷未晤後服猶昏寔繁有徒梗我王略公弼

諸州事鎮撫關河肅奉成規事等蕭寇出屯西壘影
嚮南平梁州齊興太守顏僧都魏興太守裴師仁阻
絕城郭衆踰一萬謀據漢北將至城下公毗贊計謨
盡其晨夜遣繹精銳先據始平要擊多殺二賊鳥竄
及蕭瑣魯休烈來寇上明姦回猶騁豕突方縱又鎮
軍將軍蕭穎胄佐命西朝政教攸在一朝徂殞内外
怵然以公式遏有方朝野茲寄爰下璽榮徵公入輔
聞命選徒裹糧遄邁紀郢魯識其疆域會諸建乃
丞圖和帝仍除侍中右將軍行荊州事公運以英規
罪人斯得七州底定百揆時叙大蕃興后来之歌皇

輿無反顧之慮和帝西下以公為使持節都督荆湘
益寧南北秦六州諸軍事平西將軍行荊州刺史于
此時帝將與賢昌我侯國承天革命磐石斯建維城
大啓公勲兼望夔親惟魯衛帝曰欽哉胎字南服天
監元年四月封始興郡王食邑二千戶江漢之紀寔
惟南國形勝之要正鎮西楚苞含蠻蜒控接巴巫今
陝之寄民望攸隆惟正誼薦天倫相維締業正督之
任寔曰允諧 詔使持節都督荆湘益寧南北秦六
州諸軍事安西將軍荊州刺史公褰襜以化犁氓張
袖以納夷狄先之以德惠後之以威刑廣田省役階

無滯訟應接如神趙召弗懈益部諸將李奉伯倚劉
季連寇亂嵒峨攬城固守公折簡以示禍福無俟兵
革之勞成都又安公之力也事間務隙常集賓僚訪
問政道談述詩賦親屈車騎軾隱者之廬虛已降尊
延白屋之士給醫藥以拯疾病建惠臺以救乏絕齊
相之樂交食客晉卿之脯糒翳桑以古方今豈能及
此振仁風乎夢水被茂澤於楚山尋加鼓吹一部六
年沮漳瀑水汎濫原隰南岸邑居頻年為患老弱遑
遽將至沈溺公匪憚澌沐躬自臨視忘垂堂之貴親
版築之勞吏民憂恐趙進益急見辟危力竭擊葉旋

城購以俸金所獲甚衆洪波無驚舉境歎服德之攸
盛皆曰神明四郡所漂賑以私粟髭眉綰髮莫不歌
頌是歲嘉禾一莖九穗生於邠洲甘露降于府桐樹
唐牀之美事符茲日並欲奏聞謙讓弗許七年丁慈
母陳太妃憂水漿不入口六日毀瘠三年扶而後起
中旨慰喻以大軍之後宜盡綏輯頻表自陳反哀
苦次服制有闕毀痛踰常羊枯不堪屐履荀顗面不
可識哀瘠在官憂未忘也其年十二月以奉徵還
朝改授平北將軍護軍將軍領石頭戍事又詔都督
北討衆軍八年詔授中書令中衛將軍續領衛尉卿

公趨事紫泥兼揔關柝絲綸惟序衿帶以清八屯斯
謐千廬無警其年秋更授使持節散騎常侍都督南
北兗北徐青冀五州諸軍事鎮北將軍南兗州刺史
以太妃憂服未闋固辭鼓吹北抬起督南兗揚竟刑
繁訟擾舊曰難治公登車攬轡懷遠能迓貝錦在路
不盜竊於遠中桃李垂蔭不潛掇於樾下李珣率由
清約馬融雅好人倫等諸國者弗能及也離碓王壘
井絡金城乘傳述國首車具選九年正月遷使持節
散騎常侍都督益寧梁南北秦沙七州諸軍事鎮西
將軍益州刺史西通渭滿北指秦川鳥鼠河沙之酋

龜茲隴右之長良與方族塞馬千羣趨庭恐後魏攻
巴南安太守垣季珪堅壁拒守南安將校挺竄三巴
百縣狼顧影伺公命旅授師箝無遺榮戎途匪日凶
鋒折道遐迹具瞻夜戶不閑問子真於谷口祭仲元
於圭畿表君平之舊廬軾長卿之故館停驂詢俗捐
客誨經聿循復漢講堂禮殿誕於成都紹文翁之教
習飲射之儀命王冲子廣信侯映降為諸生率先胄
子執經受業適道為羣長多移步相觀競好信達多
人不師古道則業夫咲之十四年更授使持節散騎
常侍都督荆湘雍益梁寧南北秦八州諸軍事鎮右

將軍荊州刺史同郭伋之再至等黃霸之重來下車
之日舉賢彈枉都邑安寧川域無反有以公指麾
□□不言□□為典容其短仰公慈哲莫不改過
開立序校肆習生徒採玉荆山求□赤水赴我計車
識道八九顧視□園十五平賓或諱□中之寧部乞
師衛行□□薦公檢蜀眾精勇者授之故將不廢
荒部斯道乃清□會□於益□十七年第七兄司空
安成康王薨公同胞異體弥深友愛奉問驚慟絕
復蘇珠散絕流解投弗垂累月積時涕洟勿輟十八
年徵授侍中中撫將軍□□□同三司領軍將軍明

良哉於壹德羣僚仰乎碩輔仁人周親於斯爲盛匹
色立朝勞而弥序貴而思降夙夜匪懈吐握無怠弘
濟于艱難宣力於治忽方誕講五戎重司九伐將領
脩法介服亭立乃爲之三令五申識日設□□□朴
表_紉掌景司待景□道絕趨拜亦不以廢禮有譏普
通三年十一月八日薨於位爰初邁疾至大漸輿
駕驟幸有廢寢膳公慮貶神和辭不稱劇遽平反席
湛然無撓上震悼遣侍中□□護喪事惟宜不
貸_迨葬詔曰故侍中中撫將軍開府儀同三司領
軍將軍始興郡王憺茂脩於同氣治績於相庭輝光

庶務翼佐運始勲隆陝服契闊屯夷劬勞蕃寄自內
掌戎司嘉猷弥著方正位論道弘贊宸闕奄焉喪次
朕用傷悼于厥心飭終加等寔惟首諮宜仁靈車以
臣追誥可贈侍中司徒驃騎將軍餘如故給班劔廿
人羽葆鼓吹一部謚曰忠武王禮也惟公栖心衡泌
則繕性虛寂枕戈授律則勲隆協贊孝敬盡於君親
仁義行乎鄉黨孜孜爲善溫溫克讓機神妙極斧藻
英華□□□□□□□□政存勿擾治貴無爲績著
荆蠻化行江漢刃宣其利鑒獻其朗推賢下士降尊
就卑無棄賤貧所珍儒雅鹽梅鼎實舟楫大川信列

辟之羽儀庶僚之准的者也加以深信大道妙識苦
空味絕滋腴身離煩渴□□□□□□□□□□□□□□
山世鑽仰道俗影附功高宇宙譽穆惇史自馳叩潛
光鹿抃將駕吏民哀慟襁絰成林瞻大山而弥悲仰
棟宇而興慕諒已鏤金雕玉昭像鳳墀飭碧繪丹厝
形驂閣戎狄思耿胡羌悲鄧告哀墮淚不□□□□□
□□□□□□□□故吏羅玄昭等煙霞絕阻川路悠長不
及卜遠之晨罔遠易名之請灑泣無寄銜恨莫伸謹
遵前議刊□立碑髣髴令德依稀神儀傳世代而莫
朽等山岳而無虧其辭曰日月貞明川岫澄清□□□□

奉職毗世作楨於鑠忠武體二於情義均與日道藹
間平棟梁是則羽翼人英木運告圯繇倫殒覆我
歸親睦若恂係兵猶何轉轂締構寶曆山河萬寓
雲雷利建此南土比漢於梁方周于魯擁旄推轂
出蕃人輔車服以庸旗章有序六條設教八命冒彰
再臨七澤傍
恩浹樊襄有來斯穆無思不康弘闡聖化休我烈
光文武蕙姿出內均美式茲肅雍中壘儀形三
事飛騰九軌緝是謳歌明茲獄市方赶上鉉燮理陰

陽倍觀鑾日觀侍

蹕隴鄉遐

嚮化

公後

此台光報施為虛福仁遂爽瓌樹云落人倫

安放罷市四蕃行號十壤吏民推慕賓御

安託蟬佩空想如鄭喪傷由晉亡嚮西光曖曖東川

瀼瀼時謝深恩年流德廣式雕玄永寄希仰侍中尚

書右僕射宣惠將軍東海徐勉造前正負將軍吳郡

張法明監作

吳興貝義淵書

丹揚序

賢明刻字防閤吳興郤元

石

文二千八百四十許字全剝闕者八十餘字蘭泉

錄者一千三百六十許字今增繹出千有二百二

十字正蘭泉誤釋十六字其識而未確及漫不可
識者僅百八十許字 第五行雷震不驚事史未
載 第十行除侍中將軍史不載 第十一行食
邑二千戶二史作三 第十七行中衛梁書傳誤
作中軍本紀四月仍作衛八月又誤軍 第十九
行離碓史記河渠離碓漢書溝洫離犖 七州史
作六州鄱陽王恢傳十三年都督益寧南北秦沙
七州諸軍事益州刺史乃止五州疑其遺南北梁
也其前爲荊州刺史都督之九州則多荆湘南北
梁也 第廿一行業夫當猶僕夫 第廿二行八

州史作七州 雍下似益史作南梁史無益故云

七州 第卅五行立下刻時遺一字未注補

梁吳平忠侯蕭景神道石柱題額

在始興碑西南三里亦見六朝事迹所謂花林之北
石柱一又謂神道在清風鄉花林邨者也花林之名
今猶存其文反刻順讀其柱南直西石獸其東獸亦
存而東柱亾久矣安成西碑南側亦有石柱其額剝
爛不可搨其前二行以碑額推之當是梁故散騎常
侍今唯故散二字略可識亦反刻順讀差足爲此柱
額比例惜兩東柱並亾末由臆測其對此反刻者云

何目

梁臨川惠王蕭宏神道二石柱題額

在上元北鄉張庫邨去安成碑南可十里距朝陽太平兩門各二十餘里自六朝事迹著錄後元明迄今金石家皆未之及同治戊辰八月訪吳平石柱花林一邨交漫言張庫兩石柱正與此相似尤高大亦梁武帝墳也

邨人指秀檐景諸碑柱皆謂梁武帝墳

因冒雨亟尋獲之其

東柱順讀始右西柱逆讀始左又與安成吳平兩反刻不同字畫精美絕似瘞鶴銘疑上皇山樵一手書也兩楊州牧楊字並从木王懷祖氏讀書雜志厯引

史漢碑版以證楊州字隋以前从木唐人誤从手得此二石又增一確證

梁南康簡王蕭績神道二石柱題額

梁書南康簡王績高祖第四子也普通五年加護軍將軍大通三年薨于任贈侍中中軍將軍開府儀同三司金陵新志南康簡王墓在句容西北二十五里同治己巳甘泉張肇岑訪獲于句容之侯家邊

梁建安敏侯蕭正立石柱二

六朝事迹謂墓在瀉化鎮西宋野石柱塘去城二十五里又謂神道在鳳城鄉者也

梁新渝寬侯蕭映西關

在句容以諸闕例之侯下只應有一之字而此有三字空審石上乃似無字者

梁瘞鶴銘

同治戊辰江中又出小石一片有也迺石旌四字作二行位之高碑與此下一石同迺下猶有大半字影而石上猶有餘石可容二字計迺上餘石亦當有半字而並若無字者然何也

宋重刻在西崖上者存上半段如鈎畫者然其下端略齊逸王耶經各得少半字冥右銘各得大半字局

下是右非左則下右割當爲左割隱字及其下半字不可識可增今五石本廿六字重十八字

魏孝文帝弔比干文

嘉道以來相習尚元魏人碑版此石朝廷著作書手尤極一時能事莫精誼當冠一代老輩以元祐重刻不甚重之非鑒之眞者每經比干廟此石獨精采動人徘徊不忍舍去咸豐庚申初秋手拓此紙辛酉初夏乃翦貼于湖北撫署多桂園書示繩兒

魏慧成爲父始平公造像

授堂金石跋引隋書謂元孝矩祖修義父子均孝矩

西魏時襲爵始平縣公此記或子均爲修義所建蓋以既有元氏師僧父母塋會蘭泉萃編已辨證其不合謂始平公或別一人良然據記云比丘慧成父使持節光祿大夫洛州刺史始平公奄焉薨放又云遂爲忘父造石像則始平公者慧成父也慧成不知何人故始平公亦不可攷記以太和十二年九月訖朱義章書孟達文自漢以來碑版存于今有書人名者始建和元年書武班之嚴祺伯魯次卽建甯四年書西狹頌之仇靖漢德五年書郝閣頌之仇紼子長次卽太和七年書孫秋孫等造像記之蕭顯慶次卽義

章降而王遠書石門頌王寶書石窟碑陶弘景書許
長史舊館壇碑貝義淵書忠武王蕭憺碑王長儒書
李仲璇修孔子廟碑則此風大開矣太和上距曹魏
黃初二百四五十年義章作書猶元常典則宜得以
名顯也碑頌記文及界行梵凸文異他刻而氣韻生
動倍見精采咸豐五年正月三日

元氏崇信桑門史至特作釋老志自孝文遷洛陽終
東西魏其造像碑銘在洛陽今見者大小幾五百石
亦不勝紀錄矣慧成一石刻寫精異時代又首諸碑
所以寶貴正月六日又書

十六國春秋夏勝光三年魏有平西將軍始平公隗
歸先此五十七年

魏楊大眼造像

楊大眼爲孝文造像碑無年月魏書本傳世宗初裴
叔業以壽春內附大眼奚康生等率衆先入以功封
安成縣開國子北史同碑云南穢旣澄震徂旣振歸
闕殆卽其事此記卽以此時作也碑末單書武字不
可曉豈欲紀宣武年號而未竟耶碑書大眼歷官有
梁州大中正兩史失載而兩史安成縣碑作安戎縣
攷魏書地形志唯有安戎縣爲秦州略陽郡所領其

燕西汝南岳安宕都四郡並領有安城縣而非安成
當據碑補正之乙卯開歲七日

魏靈藏薛法紹造像

鉅鑪魏靈藏河東薛法紹二人造像碑亦無年月與
楊大眼碑同出洛陽伊闕字勢又相近殆同時作也
其波磔自然處並可悟屋漏法橫畫多帶分隸亦見
蘭臺發源 古刻無花字始見此碑前人謂花爲太
武始光新字或又謂葩之行書譌變而成花又變而
成醺李楷述身賦發花與英華韵發花卽發葩故文
選琴賦注引郭璞曰葩爲古花字後漢書張衡注醺

爲古花字亦是葩字此碑有鵬擊龍花又云合門榮
葩直以花葩爲華因變成假矣爾雅釋畜注今之桃
華馬釋文華本又作花同豈景純卽已假用不必新
字耶乙卯人日又書

魏石門銘

又識西壁漢永平刻文後四行宋其筆勢亦遠書也
均諸卷尾

魏高使君懿侯碑

高羽真碑魏石刻之最整隋者與張神園一石同在
正光時可稱雙絕咸豐己未九月京師裝

東魏太公廟碑

此紙庚申八月經衛輝繩兒手拓者辛酉二月翦貼于太湖軍幕碑前半重錄晉盧无忌表後半乃刻穆子容文又一式

此拓咸豐辛酉冬收于皖城以校去秋經衛輝所拓尚多存十許字以校蘭泉萃編所錄又多損十餘字蓋嘉慶末道光初拓矣臘月五日繩兒重裝貼過爲記之右跋又一本

北齊西門君之碑頌

此頌庚申七月出都時李芊僊大令持贈繩兒者欲

經漳南岸手拓其陰過去抵安陽乃憶之適市中出
此收歸以校蘭泉所錄可識者多將百許字則此陰
又乾隆前拓矣辛酉暮春校書鄂撫署多桂園繩亦
自祁門來翦貼觀覽因記

隋龍藏寺碑

眞書至初唐極盛而初唐諸家精詣北朝無不具者
至開皇大業間卽初唐矣此碑置之褚登善諸石中
殆無以別知卽所從出也前乎此之武平六年道興
造像記後乎登善之王居士磚塔銘皆是一家眷屬
前輩至謂磚塔乃集此碑字所爲固不必然亦見其

波瀾莫二矣碑在正定城中大佛寺額字猶完好如
新其結體卽開伊闕佛龕其精悍奪人又與張猛龍
碑額分道揚鑣鵠庵此本校近拓多完七十餘字尤
可寶貴當別求精拓額字合之同治己巳三秋持示
命署其首因識邵亭珥笈

隋孔宣父靈廟碑

此種書品在曹子建碑之上隋碑之甲乙也前人金
石書竝未箸錄咸豐己未京師裝成識

隋欽江縣正議大夫甯贇碑

是碑在廣東欽州翁阮兩金石略未箸錄 開皇十

七年令狐熙爲桂州總管華夷感化俚帥甯猛力在
陳世已據南海隋因而撫之拜安州刺史猛力恃險
驕倨未嘗參謁熙諭以恩信猛力感之詣府請謁不
敢爲非熙奏改安州爲欽州 大業元年劉方平交
州經略林邑遣欽州刺史甯長眞等以步騎萬餘出
越常通鑑上竝見 隋書劉方傳仁壽末授驩州道行軍
總管經略林邑方遣欽州刺史甯長眞等以步騎出
越常又見林邑傳

隋馬興墓誌銘

唐咸亨元年

右誌一文二紙前紙高廣一尺一寸十三行行十三

字後紙高廣各一尺一寸六分行十四字當是一石
兩面刻也蘭泉未錄淵如云在孟縣三行或五行
府十一行慶下口皆刻後旁增見古人之質慶下
添似壺循下不可識末一行乃妄鐫

唐隨清娛墓志

隨清娛墓志昔人皆未之言道光間始有傳之者同
治壬戌秋張仙舫觀察攜有拓本借讀依其式鈔出
如右既非唐人刻志行款則不自土出可知謂是汝
南公一例槩本不應第一行公字有利削補石之紋
覈其字畫蓋與邇日刻開皇蘭亭如一手所爲

唐□夫人程氏塔銘

此殘誌丰韻絕佳大似敬氏碑塔銘

唐明徵君碑

在上元棲霞山麓去梁安成碑東北五里許秋棲霞
爲金陵絕勝寺已燹毀而碑歸存棲霞今日之遊賴
此石猶可語耳碑以上元三年高正臣奉敕書御製
文字近懷仁集聖教序亦去太高兩宗御墨不遠初
唐佳刻照眼若新良不易得唯末行年歲上闕上元
三三字剝痕尚新嘉慶諸老箸錄皆未言蓋近在廿
年間篆額者王知敬其結銜字意獨不與本碑同兒

子彛孫習摹知敬書謂此結銜直是李藥師碑意當
爲知敬自題審觀之尚不謬因埒存其說唐人篆額
又自題銜蓋他碑所未有也

唐龍角山慶唐觀紀聖銘

咸豐己未十月在京師先收得碑陰攜之趙州度歲
繩兒剪貼以爲楷式庚申春入京復獲正碑于琉璃
廠肆彙爲一冊此文蘭泉未錄碑陰淵如亦未見呂
君小楷書亦是一時能事 御製禦書四字張說題
建碑年月呂向書 碑陰第一橫之左又有長慶三
年李寰等三人題名

唐開祝衡嶽銅簡文

簡高一尺五寸有半廣五寸彊咸豐初山農鉏土得之舊藏易小屏大令今歸李氏正面五行背三行小楷書戊寅是開元二十六年

唐三墳記

少溫書碑今存者大字以般若臺銘爲第一此記及庾公頌亦皆極致之品非遷先塋之開失城隍廟之重刻者比咸豐庚申十月繩兒檢出觀覽爲題

唐惠山石牀題字

同治丙寅九月初在百禊室觀鈎刻聽松石牀題字

其補正竹雲章谿遺誤伯鼎岐疑一如天如華頌唐
陰唐側別文同石者分合了然善矣其云兵亂火燬
或昇運金陵則傳聞異詞固疑此石未泯歸道無錫
亟泛舟訪之循寺門基而登果得諸道東亭下牀端
翹起聽松字煜煜映斜日射人目倚慙摩久之牀
面趙希衮大書題名極似涪翁筆勢命家僮拓二篆
以行少溫書李卿述三墳記謂老沙防焉蓋取堅頑
能久此石堅頑帶沙質豈亦老沙耶聊爲少溫書之
一證還舟漫識卷尾將寄詒陌楔室主人知此石尚
無恙足供好古蒐訪當同此欣快也展重陽日

唐李含光碑

此碑自乾隆壬子錢辛楣先生屬汪稼門蒐訪僅存
碑石廿三片合全半字才一千四十餘目碑四面刻
通計首尾千六百餘字此本字全闕者三百七十餘
存者全字半字尚合千二百餘蓋查二瞻舊藏舍弟
祥芝收之祁門者當明季 國初拓本較乾隆時猶
多二百許字其拓不分明處乃被俗子墨填失其精
采大可惜也同治甲子歲仲秋月朔邵亭珥安院中
裝成記

道光丙午冬在黃虎癡安黔陽學署觀其所藏顏碑

以此碑正面未翦一紙爲最舊拓謂今句容所刻補字出汪稼門得宋本鉤傳者皆惡劣惟何子貞有四面全拓校其僅正面者尤希世之珍也今完拓旣不可得此拓旣校稼門所收多二百許字亦足珍矣此魯公年六十九時書也計今顏碑存者前二年有元次山表墓碑後一年有宋廣平碑側記又後二年有顏氏家廟碑而顏碑絕筆矣是後一年有明州刺史王公德政碑見年譜今存書此碑之年復有殷夫人顏氏碑凡皆魯公晚年書融會篆分隸爲一家無意于工工乃獨絕其俊偉軒豁處人所激賞追摹善矣其一二拙澀天真人

所忽視尤超詣不可等倫學者合數碑觀之當自得也

自粵賊據金陵句容淪陷者蓋十餘歲稼門所收廿三碎石今又不知存亡整貼此卷畢適有克復金陵之報早晚東下當策杖一訪金壇華陽之洞天一證顏書存亡多少更蒐剔許長史陶隱居舊蹟也欣喜記之甲子歲六月二十日

同治丙寅遵義趙松于句容訪獲是碑碎石大小十五石通計全半字百九十七今又逸去三小石計十五字壬申歲甘泉張肇岑又蒐獲二石移入句容學宮共二百七十九字校乾隆時汪稼門所獲才小半耳男繩孫謹注

唐信法寺彌陀象碑

顯慶三年四月在元氏縣東北雲起寺鄭萬英文無
書人 尚有碑陰及兩側題名此未具 此碑楷法
絕佳可與獻陵昭陵諸石竝驅唐初書家精美如此
乃不以名顯爾時書道之盛可想見

唐人楷書

此皆因宜堂帖所刻一帖兩縮本外皆以元石鈎摹
入刻碑塔杳冥君潘智昭三種幾于亂真矣同治甲
子初夏

南唐妙因塔柱所題佛語

此石建于南唐徐鉉題其額曰妙因在栖霞寺之東
卽隋時葬舍利處見張敞頤六朝事迹近嚴觀記江
甯金石乃以塔爲隋建其題刻爲陀羅尼經語并誤
宋劉蒙伯碣文

君謨此書雖亦規模魯公而以匾格爲之直似今日
殷試朝考法度古人碑版意思蕩然矣金石家于汴
京以下之刻等諸旣灌而往不唯書法卽刻工亦失
其傳此卷以閩石難得又蘭泉未錄故翦莊出子弟
觀究勝時賢十倍咸豐庚申十月懷甯縣廣邨之寓
邵亭書示繩兒

宋瀧岡阡表

此碑陰卽歐陽氏家譜一卷小楷尤精美當別求之

宋敦興頌

王蘭泉謂惜唐英之名不可攷按唐英當是姓名
特人不可攷目刻在長安虞永興夫子廟堂碑陰有
篆額而此本未備虛儀先三字在石泐落處山夫竹
汀本宣猶全乎蘭泉所錄于碑第二三行闕字與今
本同不應首三字獨全蓋據山夫說載入目咸豐辛
酉四月鄂撫署多桂園翦貼此種錄潛研堂跋尾于
後示繩兒

宋元祐黨籍碑

宋史徽宗紀崇寧元年九月己亥籍元祐及元符末宰相文彥博等侍從蘇軾等餘官秦觀等內臣張士夏等武臣王獻可等凡百有二十人御書刻石端禮門庚子以元符末上書人鍾世美以下四十人爲正等悉加旌擢范柔中以下五百餘人爲邪等降責有差二年八月辛酉詔張商英入元祐黨籍三年二月己酉詔王珪章惇別爲一籍如元祐黨六月戊午詔重定元祐元符黨人及上書邪等者合爲一籍通三百九人刻石朝堂餘竝出籍自今毋得復彈奏五年

春正月戊戌彗出西方其長竟天乙巳以星變避正
殿損膳詔求直言闕失毀元祐黨人碑復謫者仕籍
自今言者勿復彈糾姦臣傳蔡京崇寧元年代曾布
爲右僕射二年正月進左僕射京起于逐臣一旦得
志陰託紹述箝制天子時元祐羣臣竄敗死徙略盡
京猶未愜意命等其罪狀首以司馬光目曰姦黨刻
石文德殿門又自書爲大碑遍頒郡國初元符末以
日食求言言者多及熙寧紹聖之政則又籍范柔中
以下爲耶等凡名在兩籍者三百九人皆錮其子孫
不得官京師及近甸五年正月彗出西方其長竟天

帝以言者毀黨碑凡所建置一切罷之此塌乃三百九人之本嘉定辛未權知融州軍沈暉所重刻者在今廣西融縣又有慶元戊午饒祖堯刻者在廣西臨桂于諸賢已沒者皆注曰故校沈本猶備明倪元璐題元祐黨籍碑云諸賢自涑水眉山數十公外凡二百餘人史無傳者其所見卽三百九人之本戚學標書倪跋後云倪謂其碑自靖國五年毀碎此或失攷按史碑立于崇寧元年蔡京請徽宗書刻石端禮門其毀以後五年星變則劉逵之請方靖國時碑未立也安得預毀徽宗通在位二十五年大中靖國一年

百無五年所刻奸黨司馬光下大小臣百二十而云
二百餘人不應多其一倍由是言之彼所見特僞本
耳林雲銘卽謂其靖國五年二百餘人之說有誤今
攷倪氏特誤崇寧爲靖國讀史未審耳西仲鶴泉旣
未見碑本竝史之年重定合籍凡三百人刻石廟堂
之文亦未之見校倪尤疎也碑刻以崇寧三年京敘
云嗣位五年者通靖國前一年未改元時計之耳舍
弟庭芝欲通爲攷校于史所不載者取宋人說部求
之亦治古者所必資也道光癸卯春三月

宋鄆州學新田記

宋人乏佳分書唯晏表山河堰記雄逸有漢人意象
李伉此石力摹黃初孔羨得其方滿雖神明不逮庶
幾虎賁中郎之似亦宋碑之傑出者矣辛酉初夏多
桂園書

宋達州進奉大禮銀鋌

款識三行云達州今解發寶慶三年紹定元年分進
奉大禮銀一大鋌重伍拾兩奉議郎通判達州軍州
兼管內勸農兼權州事臣任隆祖中有人名湯孫朱
榮山澤而止澤字倒書向上結銜行後復有靳德一
郎記五小字

此鋌重準今庫平五十兩少一兩四錢準東南市用
漕平少四錢 同治元年皖南鎮總兵官唐義訓統
強中營駐休甯掘黃氏窖藏得銀七千餘兩以充餉
中有此鋌舍弟祥芝拓其款識以存

村錄卷第二終

石阡徐祖揚校字